



Peserta turut berpeluang meninjau kemudahan sedia ada di universiti di Perth.

Berkongsi pengalaman, maklumat di Perth

Perth: Pelaksanaan Program Mobiliti Pembelajaran Profesional selama dua minggu di ibu negara Australia Barat, baru-baru ini, membuka ruang untuk delegasi Universiti Putra Malaysia (UPM) mengunjungi beberapa universiti tempatan dan menjalin interaksi sosial dengan wakil penuntutnya.

Program itu dianjurkan Majlis Tertinggi Mahasiswa Sesi 2015/2016 Kolej Kedua UPM bersama pihak pengurusan kolej, selain mendapat kerjasama Majlis Pelajar Malaysia Australia Barat dan universiti tempatan terbabit.

Antara objektif utama program itu ialah mendedahkan peserta kepada suasana, kemajuan teknologi, perkembangan intelek dan tahap

pendidikan, sekali gus mempelajari kemajuan serta aplikasi sosioekonomi di bandar raya ini.

Galak pertukaran ilmu
Pengarah program, Saniah Mohd, berkata antara universiti dikunjungi ialah University of Western Australia, Universiti Murdoch, Universiti Edith Cowan dan Universiti Curtin yang menyambut positif ketibaan delegasi.

Menerusi pertemuan itu, beliau berkata, kedua-dua pihak UPM dan universiti terbabit saling berkongsi pengalaman dan maklumat mengenai institusi masing-masing.

"Melalui peluang ini, kita dapat menggalakkan pertukaran ilmu pengetahuan mengenai sistem pengurusan dan

pembelajaran di universiti masing-masing," katanya.

Martabatkan nama baik
Sementara itu Ketua Delegasi merangkap Pengetua Kolej Kedua UPM, Dr Saidon Amri, berkata program itu merupakan platform untuk Majlis Tertinggi Mahasiswa memartabatkan nama baik kolej dan universiti ke peringkat antarabangsa.

"Program sebegini bukan sahaja memberikan banyak pengalaman dan pengetahuan, malah membolehkan peserta mempraktik kemahiran seperti dalam aspek berkomunikasi dan berfikiran kritis," katanya.

Yang turut menyertai program itu ialah Ketua Felo Kolej Kedua UPM, Dr Mohd Hafizal Ismail selaku pemantau.



Kunjungan ke Universiti Murdoch turut memberikan pengalaman berharga.